

پونہ جو بس بیٹی ترویو انوس ای ژاغا تورتانی شامو شوئی بیٹی اوشوئے۔ ہیہ لو فیصلہ ہوئے کہ ہیارا بس گنیسی۔ تان دی خسمتی نیزیسی وا گوردوغوتے دی آرامی دوسی۔ ہیہ لُوو سوم اتفاق کوری ای پیٹھیرو لاوارا بار ان یُو خامیئے گوردوغو ٹک ارینی۔ بار ان سورتو تیکہ دیتی خسمتی نیزیکہ پرانی۔ دیہو موژا استانی مگم رویان وشکی غیچ دیتی انتظارا استانی کہ دیہو کا کی پوشیتانی کیہ خورا کہ انزینیہ رے۔

پھوک مودا خسمتی نیزیکار اچی خیشیقان غول ڈال بیٹی دیہو موژو بیکو پوشتانی۔ ای خیقو ساربخار کوریکو تیز تیز لُو پرائے کہ ہنون دیہو ریژیو انگیتی بوتہ اشٹوک شیر۔ ہیہ لُوو کار کوری سخت خوشان بیٹی وشلی تھے بیسی رے چھیو ہوئے۔ ای وشکی ژیریا بی شاپیک ژیبوسی ای وشکی اشٹوک لاڑیسی۔ تیز تیز سامان ای ژاغا بڑا ٹھیتانی۔ گوردغو حفاظتو بچن شويا دورا خبار پرانی۔ وشلی اشٹوک رو اوشوئی جم پھونک وا جم بشئیک۔ ای بیٹی تیز تیز اشٹوکو ژاغوت راہی ارینی۔ کوئی نو بیچئے وشلی پونو تان دنیوتے اوشپوناو راہی ہوئے۔ پھوک ہارینہ لوژاو شمشاد اخلینیو سورا کپالو ساوزییاو۔ پونگی نوغ کاوش، تاژو نوغ بند تکہ، کھونان لکھی نوغ کاوشان انجی استائے۔ شوئیکو اشٹوکو ہواز کاری ہائے۔ تیز کوسیتانی دیہو خور اشٹوک لوژاکن ڈالہ اشٹوکو ژاغاتوریتانی۔ بشونو ختم بیکو سوم غولو موژین ژاغا نیزی تنہا ژاغا نیشئے شاپک الانی۔ اشٹوک شروع بیٹی اوشوئے۔ اشٹوکو سوری خیال کوری تیز تیز شاپیک اویونی۔ اشٹوکو ژاغا موژا ڈوک تاوا انگار روشت کوری اوشوئے۔ ہروسکی جم روشتی جوانان پھوناو اوشونی کا بشئیوا پھنینیان۔ پڑالان ای بیٹی تان واروت پھونتانی۔ ہر دیہو تنہا ہنگ، ہر ہنگوت تنہا غیردیک۔ چڑان خیزان ہواز ہر پھونکو ہوستہ ہوسئینی وا کیہ وت کیہ وت جم پھوناکتے استاناری زوری۔ دیہو عوراتن رانگ استانہ نیشی اشٹوک لوژاو اوشونی۔ دورو زنانہ دی استاناری یُو کوری زوری اولیئاو اوشونی اخیرا نوغ شابوکو پھونیکو واری ہائے۔ ہتو وارو بشئیتانی۔ نوغ شابوک مہمیز کوری موژا پرائے۔ استانہ دی قوژد ہوئے شابوک پھانیران رے چا ژدیک شروع ارینی۔ خیزو سوم جوستہ پھوناکو پونگ دی برابر باو ہائے ہر وشکیاری قوژد استناری زوری، اخیر بشونو ختم بیکو زبردست چڑان سوم شابوکو پھونک ختم ہوئے۔ اچی چونگ ریگیسی پھونتانی۔ پھستوکو اوچہ نوپتیک دی ہونی۔ اخر مینوان واری ہائے۔ وشلی انتظارا استائے اشٹوکو قاضی اعلان اریر کہ ہنسیین نوغ گیرو مینوان موژار کا پھانینی۔ اعلانار اچی ڈافن ہواز وا بشونو شروع بیکو وشلی پھونیکو نیسائے۔ نوغ گوژ بندو ساوزیتائے، پونگی کاوش زبردست چاژ وا خاز، سوئیرو ہوسئینی ہوستہ، ڈافو اوچہ بشونو ہنگو سوم

جوسته وشلیو پونگو انداز دی خاص اوشوئے۔ بشونو ختم بیکو سوم نو نشیکا پت اشٹوکو قاضی  
اعلان اریر کہ مینو بنیسے بشئیے پھانیر یکدم ڈفوی گنیتائے لش لش ٹپہ کوری یی ژینگیتائے۔  
ائے مه ژان-----

مه پری ژور نو کورئے ژور کی اریر پری کورئے

قلا ہور پھستی کوری جنجیلو متی کورئے

یا لال ائے یہ لال کروئی شونی اشپیردونی

تہ مس مو خو مه پاشئیے انگارو موژو مه دونی

مه پری پھوک نا فہم ہر دیو کورئے بے فہم

ائے اوا تہ چشمی زخم اللہ کورار متے رحم

ڈفن ہواز، خازو ہواز وشلیو پونگ اوسناو زمینہ ہر وشکی روان، پھونک نوغدار شروع، قوژدو موژی  
استناری زوری، ڈف ہوستہ تان اوشوئے۔ بیر موغان سوم جوستہ ای شونگ شاوائے گیتی ڈفو  
پرائے۔ ای کما خور غیردی سخت چڑان سوم جوستہ وشلی ہر وسکی تعظیم کوری نیشیکو ہائے۔  
شونگ شاوئیو ہوسوئینیان وا زوریو بیر موغان تان سوم گنیتائے۔ اشٹوک دی چھوئیو آخری حصہ  
گیتی ختم ہوئے۔ نوغدار شاپیک دیتی اشٹوکو نسی نیزیتانی۔ وشلیو چیت سخت شاباشیگنی تان  
ژاغوت بغانی۔ دورو خخوم اشٹوکو شئیلی کوری نسی نیزیکو وا مینوان شرکت کوریکو شکریو کوری  
پونوتے دی پوندی وشلیو اوچہ ملگیر یانتے پرانی۔ ہیہ قسمہ بو خوشانیو سورا تان منزلو وشکی راہی  
ہونی۔ تان ژاغا توری پھوک آرامی ارینی، خدمت بیرو بیرانی اورئے پھوک گور انگاہ ہونی چت پت

باران بوتیتانی سامانن درست کوری تان دوران وشکی راہی ارینی۔ پونو موژی وشلی کیہ وت بشئیواو  
کیہ وت مشقولگی کوری روان ہوئی۔ (جاری)